

“Sing Ceiq Gyaeundei” Laengdaiz Denyingj Vahcuengh

壮语电影幕后的“最美声音”

Geiq Cinz Hungzlinz Boux Vunz Youq Gwnzroen Fanhoiz Cauh-
guh Denyingj Vah Saw Minzczuz Haenqrenz Baenaj 28 Bi Neix

□ Veiz Bingz raiz Dahdingz hoiz

28 bi, lwgfwngz baez vad, baez yaepda couh gvaqbae lo, dauqngeix diuz roen ngutngeuj dwgrenz youq ndaw gocwngz fanhoiz cauhsuh gij denyingj vah saw minzczuz byaij gvaq haenx, ndaw sim Cinz Hungzlinz gig mbouj caemdingh.

Riengz Banlaux Byaij-hwnj Diuzroen Boiqyaem

Bi 1990, Cinz Hungzlinz bouxcoz Bouxcuengh youq diegbya lueglaeg Dava Yauzczuz Swciyen Yajlungz Yangh sengmaj neix, baengh bonj-faenh mboujduenh roengzrenz byaij-haeuj le Duh' anh Yauzczuz Swciyen Denyingj Gunghswh, dang bouxboiq-yaem denyingj. Ngoenz daih' it guh-hong, dingqnyi “boiqyaem” song cih saw neix, lwg ndaw bya neix roxnyinh bonjfaenh dwg Liuzlaujlauj haeuj Da' gvanhyenz, mbouj rox baenzlawz guh cij ndei. Boux lingjdauj faenguenj gij hong boiqyaem haenx aeu duenh neiyungz gwnz mbaw bauqceij ndeu gyau hawj de, heuh de yungh Vahcuengh bonjdieg gangj baez ndeu. Gangj sat le, lingjdauj hai aen luzyinhgih hawj de dingq gij loegyaem bonjfaenh, baedauq geij baez, baez ndei gvaq baez.

Youq laj banlaux naihsim sonyinx, Cinz Hungzlinz hainduj guh gij hong boiqyaem 《Aenruz Sawqmwh Mbouj Raen》 lo, neix dwg bouh denyingj de baez daih' it boiqyaem. Gujjang faenboiq bouxgiek hawj de, de gig nyinhcaen bae guh, boih sug daizswz, hoeng baez hwnj aendaiz loegyaem de couh ok vwndiz lo. Mbouj dwg sing saenz gangjavah gazgwt, couhdwg yiengh bak mbouj deng, diuqgah dangqmaz, siengj mbouj guh, bae guh boux cuengq denyingj.

Cinz Hungzlinz nyinhcaen caeuq banlaux hag, youq ndaw gocwngz mboujduenh lienhguh, gaemdawz le gij yaulingj caeuq gi' gyauj boiqyaem, beijlumj: Yiengh bak aeu cinjdeng, gamjcingz aeu doed ok, sing aeu byot, aeu hag rox ndwnj, haiz, daej, riu dem, yienghneix cij ndaej suenq dwg gihbwnj habgek.

Daj bi 1990 daengz bi 2000, 10 bi seizgan, Cinz Hungzlinz caeuqfaenh fanhoiz cauhsuh le ca mbouj geijlai 100 bouh denyingj. Ndawde 《Dagez-can》(gwnz, laj) aeundaiej aen “ciengj dwngzlungzbeih” guekgya, youq daengx yienh gak aen yanghcin cunz-dauq cuengqingj, bouxyawj miz daengz 30 lai fanh vunzbaez, ndaej

gwnzbiengz gvangqlangh haenhndei; 《Raemxda Lwggayax》 aeundaiej aen “cinmaj ciengj” guekgya.

Daujyenj Loegyaem Boiqyaem Boux Dog Gag Rap

Bi 2001 le, aenvih densigih, luzyinhgih caeuq yingjdezhgih doh-daengz lajmbanj, aen hawciengz denyingj deng cungdongj caemhcaiq doek doxroengz youqgaenj, gungh-swh mbouj miz cienz fat cienzhong, dingzlai cizgungh hainduj gag ra hong, geij boux doengzsah geq genhciz gij hong boiqyaem haenx caemh ndang nyieg bingh lai. Bi neix, gyoengq boux boiqyaem miz song boux doengzsah geq gvaqseiq, gij doengzsah bi' ndwen lij oiq haenx vihliux ndwenngoenz bae guh seng' eiq lo, gij vunz guh gij hong boiqyaem cawzbae Cinz Hungzlinz, cungj deuz liux lo, gij hong fanhoiz cauhsuh da raen couh yaek goek goenq lo! Aenvih doiq gij hong boiqyaem denyingj Vahcuengh miz gamjcingz laegna youh gig ndiepgyaez, de laebsim dauqcungz guh, ciucomz vunzcaiz, aeu gij hong boiqyaem denyingj Vahcuengh Duh' anh mbaw geiz neix gwed hwnjdaej. Yiengh-neix, de ciucomz le 4 boux baengzyoux ceiqheiq doxdoengz swhsiengj dox-ngamj daej bang bonjfaenh guh gij hong fanhoiz cauhsuh. Bihaenx 《Genjleh Dailix》 benqgojgaeq fanj nduknaeuh gyoengqde fanhoiz cauhsuh neix youq gak aen yanghcin cunzdauc cuengqingj, fanjyangj gig ndei, gij bouxyawj deng gyauyuz haenx miz daengz 40 lai fanh vunzbaez.

Bi 2002, 《Baujgen Caeuq Youh-swngh》 benqgohgyau aendoih Cinz Hungzlinz fanhoiz cauhsuh neix aeundaiej ciengjmaenhndei daengx guek.

Bi 2003, 《Vunzak Sam Boux Byongh》《Ngeihcib Haj Boux Lwgnyez Boux Boh Ndeu》 song bouh denyingj neix baez daengz seiz cuengqingj, vunzlai gig haenggyaez.

Dang Boux Duicangj Aendoih Cuengqingj Dau-cungz Laebguh Aendoih Fanhoiz Cauhsuh

Bi 2007, Duh' anh Denyingj Gunghswh guh gaijceiq, sojmiz yenz-gungh gag guhcawj genjleh hong, Cinz

Hungzlinz ndiepgyaez denyingj saeh-nieb doenggvaq doxdax ndaej cingi dauqma daengz aen denyingj gungh-swh dauqcungz laebbaenz neix, bienqbaenz boux duicangj aendoih cuengqingj ndaw gunghswh, fucwz youq daengx yienh 248 aen hingz-cwngcunh caeuq segih cunzdauc cuengqingj gij denyingj goeng'ik.

Moix baez nem ok haijbau, vunzlai humx hwnjdaej cam haemhneix dwg mbouj dwg cuengqingj denyingj Vahcuengh? Mwhneix, ndaw sim Cinz Hungzlinz nanzgvaq dangq-maz. Haeujdaengz 21 sigij le, denyingj gaenq suswva, gij denyingj gyauhsen doenghbaez fanhoiz cauhsuh haenx gaenq mbouj ndaej cuengqingj lo, najdoiq gij maqmuengh vunzlai, dangguh boux fanhoiz cauhsuh denyingj gvaq ndeu, ndaw sim de gawq roxnyinh doiq mbouj hwnj youh baenqbeq, ginggvaq fanfoek ngeix-naemj, de laebsim dauqcungz laebguh aendoih fanhoiz cauhsuh, raphwnj mbaqrap naek swncienz vabsaw minzczuz. Cinz Hungzlinz nyinhcaen ra le 5 boux vunz miz siengjmuengh caeuq gietsim guh gij hong fanhoiz cauhsuh denyingj Vahcuengh haenx dauqcungz dap daiz caemhcaiq guh son'gyauq dem.

Aendoih miz lo, ngaenzcienz youh dwg aen vwndiz hung ndeu, ciuq cwngcwz gvidingh, moix fanhoiz cauhsuh bouh benqgojgaeq caeuq benqgohgyau ndeu, cwngfuj faenbied bangbouj ngaenzcienz 10000 maenz caeuq 2000 maenz, yingiben doeng-gvaq guekgya niemhsou habgek le cij bued cienz roengzdaej, guhbaenz bouh denyingj ndeu ceiq noix aeu caj daengz byongh bi ngaenzcienz cij bued roengzma daengz. Cinz Hungzlinz cijnaengz doenggvaq haekfuk gij gunnanz gwndaenj bonjfaenh gag demh cienz gonq. Bued cienz roengz-daej mboujdan seizgan nanz, caemh-caiq biucinj hix daemq, yienznaeuz daj bi 2013 hainduj, gij ngaenzcienz bangbouj fanhoiz cauhsuh benqgojgaeq caeuq benqgohgyau ndeu faenbied daezsang daengz 15000 maenz caeuq 3000 maenz, hoeng caeuq rog gih fanhoiz cauhsuh bouh denyingj vabsaw minzczuz vunznoix gizyawz ndeu ndaej cwngfuj bangbouj 7 fanh maenz ngaenz doxbeij, gij ngaenzcienz lij dwg nanz riengz ndaej hwnj, haeuj bouj mbouj ndaej ok.

Bienqbaenz Gij Yiengh-ndei Ganbu Vah Saw Minz-

cuz Hag Haenx

Najdoiq gunnanz, gij simnduj Cinz Hungzlinz mbouj bienq, vihliux hawj hangh saehnieb neix ndaej lienzdaemh roengzbae, de rag mehyah bonjfaenh haeuj aendoih gungz neix, ciengq hwnj le gvanbaz “song vunz baenq”. Vihliux ciengx ranz, de banhaemh daiqlingx aendoih cuengqingj youq daengx yienh gak giz diegcuengqingj cuengqingj denyingj, bi ndeu cuengqingj 2900 lai ciengz, seiz ndaejhoengq, cujciz aendoih fanhoiz cauhsuh denyingj. Seizdoeng gvaq seizcin daej, de caeuq mehyah de bienqbaenz le gij rengz youqgaenj 5 aen doih, gij soemj van haemz manh ndawde, cij miz gyoengqde rox.

Daj bi 2010 daengz seizneix, aendoih Cinz Hungzlinz daiqlingx haenx gungh fanhoiz cauhsuh 46 bouh benqgojgaeq, 40 bouh benqgohgyau denyingj Vahcuengh, mboujdan hawj denyingj Vahcuengh Duh' anh miz le benqgoek cukgaeuq, hix vih gizyawz yienh ranghdieg Dahhoengz daezhawj le benqgoek. Dan bi 2017 gij soq dinghcaux denyingj bingzdaiz couh miz daengz 5000 lai ciengz, daiq gij gvansim aen dangj bae hawj gak cuz vunzlai gyaezmaij denyingj vabsaw minzczuz haenx, hix soengq bae le cihsiz caeuq angqyangz.

Mboujduenh roengzrenz, ndaej-daengz baihgwnz mizgven bumwnz haengjdingh. Bi 2016 《Loekdaibingz · Doiqhamq》 benqgojgaeq aendoih Cinz Hungzlinz fanhoiz cauhsuh neix aeundaiej Cungguek Denyingj Densi Gisuz Yozvei “Ciengj Cozbinj Maenhndei Cauhsuh Sing'yaem” sam daengjciengj. Bi 2017 ndwen 11, Cinz Hungzlinz ndaej bouxvunz senhcin vah saw minzczuz vunznoix daengx gih Gozvuyen baecinj fatbough 《Fueng' anq Sawcuengh》 60 hopbi. Bi 2018 ndwen 6, wngq Swcigih Minzyijveij dangjcu jucingj, Cinz Hungzlinz bae gizhaenx guh “mbouj lumz simnduj · geiq maenh sawjmingh” cawjdaez senh-gyangj baugau. Swcigih Minzyijveij fucujyin, gihgvanh dangjveij suhgi Veih Yungjhungz doiq Cinz Hungzlinz bingzgyaq gig sang, haenh gij cingsaenz fungyen de itcig mbouj bienq giensouj youq gwnz aen guhhong gangjvei fanhoiz boqcuengq denyingj vabsaw minzczuz vunznoix Guengjsae haenx, dwg gij yienghndei ganbu vah saw minzczuz daengx gih hagsib haenx.